

Aplaudiendo un bunita obra di nos hendenan local

Minister Michelle Winklaar a ricibi buki "Ban bisa danki"



ORANJESTAD (AAN): Recientemente Minister di Asuntonan Economico, Asuntonan Social y Cultura a ricibi bishita na su oficina di Noris van Lis-Donata, ex parlamentario, pa haci entrega di e bunita buki; 'Ban bisa danki' pa comunidad di Aruba, specialmente nos muchanan.

E buki 'Ban bisa danki' ta contene un bunita mensahe y ta conecta cu religion general, niun religion specifico, pero si pa nos muchanan bira consciente cu ta existi un Creador, ya cu hopi di nos muchanan ta refleha un bashi riba e parti religioso y ta lubida riba nos Creador.

Minister sigur a sinti'e masha honra y encanta cu e bunita buki aki, ya cu loke ta haci un buki unico y dun'e balor, ta su contenido.

E mandatario a expresa cu e ta haya cu e buki ta concentra riba un topico hopi actual y cu e potretnan den e buki lo capta atencion di tur hende, mescos cu el a capta di dje. E mandatario a keda hopi contento cu den e buki a haci uzo di nos propio muchanan di Aruba, ya cu esaki ta crea un miho relacion y conexion cu nos muchanan.

Minister Hooyboer-Winklaar ta sigur y ta sostene e pensamiento cu lesamento ta un fundeshi esencial pa nos muchanan, ya cu e ta habri nan horizonte y conocimiento cu idioma y mundo en general.

P'esey mes e ta gradici tambe Señora Norris van Lis-Donata pa su excelente trabao como tambe UNOCA cu a patrocina e bukinan y awo e mayornan por cumpri e buki di tremendo calidad na un prijs unico.